



Կարգապահական գործ ԿԳ-14135

Հայաստանի Հանրապետության փաստաբանների պալատի խորհրդի  
2015 թվականի հունվարի 16-ի թիվ 4-րդ ԿԳ նիստի

**Ո Ր Ո Շ ՈՒ Մ թիվ ԿԳ/3-Ա**

**ՓԱՍՏԱԲԱՆ ԱՐԹՈՒՐ ՄԿՐՏՉՅԱՆԻՆ ԿԱՐԳԱՊԱՀԱԿԱՆ ՊԱՏԱՍԽԱՆԱՏՎՈՒԹՅԱՆ  
ԵՆԹԱՐԿԵԼՈՒ ՀԱՐՅՈՒ ՔՆՆԱՐԿԵԼՈՒ ՄԱՍԻՆ**

Հայաստանի Հանրապետության փաստաբանների պալատի (այսուհետ՝ նաև՝ Պալատ) խորհուրդը (այսուհետ՝ նաև՝ խորհուրդ), նիստը նախագահող՝ Տիգրան Խուրշուդյանի, խորհրդի անդամներ՝ Մելանյա Առուստամյանի, Սիմոն Բաբայանի, Նելլի Հարությունյանի, Կարեն Մեծլումյանի, Լուսինե Սահակյանի, Լիպարիտ Միմոնյանի, Ալեքսանդր Միրունյանի, Երվանդ Վարդանյանի և Մարտուն Փանոսյանի կազմով,  
քարտուղարությամբ՝ Նոննա Համբարձումյանի,  
քննության առնելով փաստաբան Արթուր Մկրտչյանին (արտոնագիր 1226) կարգապահական պատասխանատվության ենթարկելու վերաբերյալ հարցը,

**Պ Ա Ր Ձ Ե Ց`**

**1. Կարգապահական վարույթ հարուցելու առիթը և հիմքը.**

Համաձայն ՀՀ փաստաբանների պալատի գլխավոր հաշվապահի կողմից ՀՀ փաստաբանների պալատի նախագահին 27.10.2014թ. տրամադրված տեղեկանքի Արթուր Մկրտչյանն ունի 35.000 ՀՀ դրամ գումարի չափով անդամավճարի մուծման չկատարված պարտավորություն՝ 2014թ. մարտից մինչև 2014թ. սեպտեմբեր (ներառյալ) ամիսների համար:

**2. Կարգապահական վարույթ հարուցելու մասին որոշումը և գործի հանձնումը խորհրդին.**

27.10.2014թ. ՀՀ փաստաբանների պալատի նախագահի թիվ 365-Ա/ԿԳ-14135 որոշմամբ կարգապահական վարույթ է հարուցվել փաստաբան Արթուր Մկրտչյանի նկատմամբ՝ «Փաստաբանության մասին» ՀՀ օրենքի 19-րդ հոդվածի 1-ին մասի 5-րդ կետի և «Փաստաբանի վարքագծի կանոնագրքի» 2.9.1 կետի խախտման հատկանիշներով:

27.11.2014թ.-ին կարգապահական գործը հանձնվել է Պալատի խորհրդին:

Խորհրդի նիստը տեղի է ունեցել 2015 թվականի հունվարի 16-ին, ժամը՝ 18.40-ին, ՀՀ փաստաբանների պալատի վարչական շենքում (ք.Երևան, Ջաքիյան 2, 4-րդ հարկ, թիվ 12 սենյակ):

**3. Պատասխանողի բացատրությունները.**

Փաստաբան Արթուր Մկրտչյանը թեև պատշաճ ծանուցվել էր կարգապահական նիստի վայրի և ժամի մասին, սակայն խորհրդին նիստին անհայտ պատճառներով չէր ներկայացել:

#### **4. Գործի հանգամանքները՝ առկա ապացույցների վկայակոչմամբ.**

Պալատի խորհուրդն, ուսումնասիրելով գործում առկա գրավոր փաստաթղթերը, հաստատված է համարում հետևյալ փաստերը.

1) փաստաբան Արթուր Մկրտչյանը փաստաբանական գործունեության արտոնագիր է ստացել 15.10.2011թ. (հաստատվում է Պալատի ընդհանուր դեպարտամենտի ղեկավարի կողմից 16.01.2015թ. տրամադրված տեղեկանքով),

2) փաստաբան Արթուր Մկրտչյանն ունի 35.000 ՀՀ դրամ գումարի չափով անդամավճարի մուծման չկատարված պարտավորություն՝ 2014թ. մարտից մինչև 2014թ. սեպտեմբեր (ներառյալ) ամիսների համար (հաստատվում է Պալատի գլխավոր հաշվապահի կողմից 27.10.2014թ. ՀՀ փաստաբանների պալատի նախագահին տրամադրված տեղեկանքով),

3) փաստաբան Արթուր Մկրտչյանն իր անդամավճարի պարտքն ամբողջությամբ մարել է 07.11.2014թ.՝ կանխիկ վճարելով Պալատի դրամարկղ (հաստատվում է Պալատի գլխավոր հաշվապահի կողմից 16.01.2015թ. խորհրդին տրամադրված տեղեկանքով):

#### **5. Պատասխանողի անձը բնութագրող հանգամանքները.**

Պալատի ընդհանուր դեպարտամենտի ղեկավարի կողմից 16.01.2015թ. տրամադրված տեղեկանքի համաձայն Արթուր Մկրտչյանի (արտոնագիր 1226, ստացված՝ 15.10.2011թ.) նկատմամբ 2011-2014թթ. ընկած ժամանակահատվածում 2 անգամ հարուցվել է կարգապահական վարույթ.

- 09.07.2013թ. քաղաքացու բողոքի հիման վրա Պալատի նախագահի թիվ 85-Ա/ԿԳ-13015 որոշմամբ Փաստաբանի նկատմամբ հարուցված Պալատի ընդհանուր ժողովի կողմից 11.02.2012թ. թիվ 1/4-Լ որոշմամբ հաստատված Փաստաբանի վարքագծի կանոնագրի 2.7.2., 3.1.7 կետերի և 3.8.5 կետի 1-ին ենթակետի պահանջները խախտելու համար Պալատի խորհրդի 26.12.2013թ. թիվ ԿԳ47/1-Ա որոշմամբ Արթուր Մկրտչյանը ենթարկվել է տույժի՝ խիստ նկատողության ձևով (համարվում է մարված),
- Անդամավճարի պարտք ունենալու մասով 12.03.2014թ. հարուցվել է վարույթ, 18.04.2014թ. խորհրդի թիվ 69ԿԳ/1-Ա որոշմամբ վարույթը կարճվել է (արտոնություն է կիրառվել):

#### **6. Պալատի խորհրդի պատճառաբանված եզրակացությունը և որոշումը.**

Հիմք ընդունելով Պալատի խորհրդի կողմից հաստատված փաստերը, դրանք հիմնավորող գործում առկա ապացույցները և քննարկվող իրավահարաբերությունները կարգավորող կանոնները, Պալատի խորհուրդը գտնում է, որ փաստաբան Արթուր Մկրտչյանին պետք է ենթարկել կարգապահական պատասխանատվության, հետևյալ պատճառաբանությամբ.

«Փաստաբանության մասին» ՀՀ օրենքի 17-րդ հոդվածի համաձայն՝ Փաստաբանը փաստաբանների պալատի սահմանած չափով և կարգով մուծում է անդամավճար՝ փաստաբանների պալատի ընդհանուր պահանջների և փաստաբանական գործունեության իրականացման հետ կապված այլ ծախսերի համար: Նույն օրենքի 19-րդ հոդվածի 1-ին մասի 5-րդ կետի համաձայն՝ փաստաբանը պարտավոր է մուծել անդամավճարներ:

Համաձայն «Փաստաբանի վարքագծի կանոնագրի» 2.9.1. կետի՝ «Փաստաբանը պարտավոր է սահմանված կարգով և չափով Պալատին վճարել անդամավճար»:

Համաձայն ՀՀ փաստաբանների պալատի խորհրդի 26.12.2013թ.-ին թիվ 33/6-Լ որոշմամբ ընդունված «Անդամավճարների, մուտքի և այլ վճարների վճարումների վերաբերյալ» կարգի (այսուհետև Կարգ) 7-րդ կետի՝ Փաստաբանները յուրաքանչյուր ամսվա համար անդամավճարների վճարումը կատարում են հաշվետու ամսվան հաջորդող ամսվա մինչև տասնհինգը, իսկ նույն Կարգի 21-րդ կետով սահմանվում է՝ «Ամենամսյա վճար

վճարելու պարտականությունը խախտելու համար փաստաբանը կամ օգնականը ենթակա են կարգապահական պատասխանատվության:»:

Համաձայն Կարգի 17-րդ կետի՝ «Առաջին անգամ առնվազն երեք անսվա համար անդամավճար չվճարած փաստաբանի կողմից իր նկատմամբ հարուցված կարգապահական վարույթով մինչև Պալատի խորհրդի կողմից կարգապահական պատասխանատվության վերաբերյալ որոշում կայացնելը, անդամավճարի պարտքն ամբողջությամբ մարելու դեպքում, կարգապահական վարույթն ենթակա է կարճման: Փաստաբանի կողմից անդամավճար չվճարելու հիմքով հարուցված երկրորդ կամ հետագա ցանկացած կարգապահական վարույթ չի կարող կարճվել հարուցելուց հետո պարտքի մարման հիմքով: ...»: Նշված Կարգը հաստատվել է 26.12.2013թ.-ին, ուստի 16-րդ և 17-րդ կետերում նշված ժամկետները պետք է հաշվարկել այդ ժամանակահատվածից սկսած:

Վերոնշված կանոնների վերլուծությունից հետևում է, որ սահմանված ժամկետներում անդամավճար չվճարելու համար փաստաբանն ենթակա է պատասխանատվության, բացառությամբ Կարգի 17-րդ կետով սահմանված դեպքի, որի կիրառման համար անհրաժեշտ է հետևյալ պայմանների պարտադիր առկայությունը՝

- կարգապահական վարույթը պետք է հարուցված լինի առաջին անգամ առնվազն երեք անսվա համար անդամավճար չվճարած փաստաբանի նկատմամբ և
- մինչև Պալատի խորհրդի կողմից կարգապահական պատասխանատվության վերաբերյալ որոշում կայացնելն անդամավճարի պարտքը պետք է ամբողջությամբ մարված լինի:

Սույն դեպքում, թեև փաստաբան Արթուր Մկրտչյանը համաձայն 16.01.2015թ.-ին ՀՀ փաստաբանների պալատի գլխավոր հաշվապահի կողմից տրված տեղեկանքի իր անդամավճարի պարտքն ամբողջությամբ մարել է 07.11.2014թ., սակայն նրա նկատմամբ Կարգի ընդունումից հետո մինչև սույն կարգապահական վարույթով որոշում կայացնելն անդամավճար չվճարելու հիմքով հարուցվել է կարգապահական վարույթ և վարույթը կարճվել է, ուստի սույն դեպքում Կարգի 17-րդ կետով սահմանված դրույթները կիրառելի չեն և նա ենթակա է պատասխանատվության: Սույն վարույթը Կարգի գործողության ժամանակահատվածում երկրորդն է, հետևաբար ենթակա է կիրառման Կարգի 17-րդ կետի պահանջն առ այն, որ՝ «...Փաստաբանի կողմից անդամավճար չվճարելու հիմքով հարուցված երկրորդ կամ հետագա ցանկացած կարգապահական վարույթ չի կարող կարճվել հարուցելուց հետո պարտքի մարման հիմքով: ...»:

Մինևսույն ժամանակ, Խորհուրդն արձանագրում է, որ կարգապահական տույժ կիրառելիս Խորհուրդը հաշվի է առնում այն հանգամանքը, որ փաստաբան Արթուր Մկրտչյանն իր անդամավճարի պարտքն ամբողջությամբ մարել է:

Ելնելով վերոշարադրյալից և ղեկավարվելով «Փաստաբանության մասին» ՀՀ օրենքի 10-րդ հոդվածի 5-րդ մասի 14-րդ կետի, 39-րդ հոդվածի 1-ին մասի, 39.7. հոդվածի 5-րդ մասի 1-ին կետի, 39.9. հոդվածի 1-ին մասի 1-ին կետի, «Հայաստանի Հանրապետության փաստաբանների պալատի կանոնադրության» 16.26-րդ կետի, «Փաստաբանի նկատմամբ կարգապահական վարույթի իրականացման» կարգի 30-րդ հոդվածի 5-րդ մասի 1-ին կետի պահանջներով, Խորհուրդը՝

## **Ո Ր Ո Շ Ե Ց**

1. Փաստաբան Արթուր Մկրտչյանին (արտոնագիր 1226) ճանաչել մեղավոր «Փաստաբանության մասին» ՀՀ օրենքի 19-րդ հոդվածի 1-ին մասի 5-րդ կետի և «Փաստաբանի վարքագծի կանոնագրի» 2.9.1. կետի պահանջների խախտման համար:

2. Փաստաբան Արթուր Մկրտչյանի (արտոնագիր 1226) նկատմամբ կիրառել կարգապահական տույժ՝ նկատողություն:

3. Պալատի աշխատակազմի ղեկավարին՝ սույն որոշման մասին իրազեկել փաստաբան Արթուր Մկրտչյանին:

Սույն որոշումը կարող է բողոքարկվել դատական կարգով՝ այն ստանալու օրվանից մեկամսյա ժամկետում: Սույն որոշումն օրինական ուժի մեջ է մտնում սույն կետով նախատեսված բողոքարկման ժամկետն անցնելուց հետո:

Նիստը նախագահող՝

Տիգրան Խուրշուդյան